

Nd.

## 822. Nefndarálit

um frv. til laga um opinbera aðstoð við byggingar íbúðarhúsa í kaupstöðum og kauptúnum.

Frá minni hl. heilbrigðis- og félagsmálanefndar.

Frv. þetta var flutt 20. nóvember í efri deild og vísað til nefndar þar 22. nóv. f. á. Efri deild hafði málid síðan til meðferðar, og frá þeirri deild var það afgreitt 12. apríl til neðri deilda. Enginn nefndarfundur var þar boðaður til að ræða málid, fyrr en undir þingfundi 13. apríl, og var þá ætlunin, að nefndarmenn vanræktu þingfund til að sitja á nefndarfundi. Í slikri meðferð gat ég ekki tekið þátt, vildi ekki sýna Alþingi þá lítilsvirðingu.

Nú telja meðnefndarmenn mírir, að engu eða mjög litlu megi breyta í frumvarpinu, ekki vegna þess, að þeir vilji þar engu breyta, heldur af því, að þeir segja, að með því sé afgreiðslu málsins á þessu þingi teflt í tvísýnu. Þetta tel ég vítaverða afgreiðslu þingmála. Hafi verið ástæða til að ræða málid í nefnd i efri deild i fleiri mánuði, þá ætti þeim, er í neðri deild sitja, að leyfast að koma fram með þær breytingartillögur, er þeim þykir ástæða til að bera fram til bóta á málinu, og fara með málid að venjulegum bingsköpum.

2. nóvember f. á. var lagt fram í efri deild mál 59, frv. til laga um byggingarsjóði. Það frumvarp vil ég leggja til grundvallar og breyta þessu frumvarpi að verulegu leyti til samræmis við það. Ég tel eðlilegra, að byggingarsjóður sé einn og annist lántökur til byggingarfélaga, hvort sem talað er um byggingarfélag eða byggingarsamvinnufélag. Með framlagi rikis og bæja má þá lækka vexti af byggingarlánum, koma á sameiginlegum innkaupum á öllu byggingarefnini til húsa, sem sjóðurinn lánar til, og hafa sameiginlega menn til að hafa eftirlit og umsjón með öllum byggingunum, og styður þetta allt að því að gera byggingarnar ódýrar, en það tel ég annan höfuðtilgang frumvarpsins, og hann næst betur með breytingartillögum mínum en frumvarpinu óbreyttu. Að öðru leyti mun ég gera grein fyrir breytingartillögum mínum undir umræðum málsins.

Alþingi, 14. apríl 1946.

Páll Zóphóniasson.